

Date – 25/04/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Excise and Narcotics Department chuan sawrkar kum kal ta chhung khan Ruihtheih thil cheng nuai 241 chuang man hu leh a kaihnawih ah case sang 7 chuang ziah luh a ni.
2. EF&CC Minister Pu Lalthansanga'n thalaite chu mi hlawhtlingte hlawhtlin chhan zirchiang a, an hlawhtlinna phena an thawhrimna hmuh thiam a tul thu a sawi.
3. Sawrkar laipui chuan ramchhungah LPG supply tuang taka a kal thu leh distributor ten LPG an nghei loh thu a sawi
4. Prime Minister Narendra Modi chuan Pathianni chawhma dar 11 hian 'Mann Ki Baat' programme a hmang leh dawn.



EXCISE & NARCOTICS DEPARTMENT

Excise and Narcotics Department chuan sawrkar kum kal ta chhung khan Ruihtheih thil cheng nuai 241 chuang man hu leh a kaihnawih ah case sang 7 chuang ziah luh a ni.

Excise and Narcotics Department thuchhuah tarlan danin kum kal ta chhunga dan phalloh an man zingah hian sap zu leh rakzu tam berin heng hi a vaiin 105 man niin cheng nuai 172 man hu a ni a, dan phalloh man chawi tir mi 150 awmin cheng nuai 67 chawi tir an ni a, ruihhlo thahnem tak an man bawk.

Excise hian dan phalloh thil an man kaihnawih ah hian Ruihhlo phurhna lirthei two wheeler 60, LMV 75, MMV 2 leh HMV 4 an man tel a, dan phalloh thil an man hrang hrang kaihnawih ah hian NDPS Act

hnuai ah mi 789 man in case 480 ziah luh a ni a, MLP Act, 2019 hnuai ah case 6,493 ziah luh niin mi 5,937 man an ni a, ME Act, 1973 hnuai ah case 242 ziah luh niin mi 198 man an ni bawk.



NATIONAL PANCHAYATI RAJ DAY

Ministry of Panchayati Raj Secretary Pu Vivek Bharadwaj chuan National Panchayati Raj Day pualin ramchhunga khaw hrang hrang chibai a buk.

Secretary chuan Panchayat inrelbawl na chu Democracy ropuina lantirtu ani tih sawiin an hmalakna hrang hrang chu sawrkar ti chaktu ani tih sawiin Gram Sabha an neih thin te leh sawrkar hmalakna thlawp zawnga hma an lakna kawng hrang hrang chuan ram siamthat kawngah hmasawna tam tak a thlen tih a sawi.

National Panchayati Raj Day hi kum tin April ni 24 ah lawm thin niin he ni pual hian Mizoram ah pawh hun hman niin DRDO Aizawl Conference Hall-ah Rural Development & Administration Department Minister Prof. Lalnilawma'n a hmanpui a, Kum 2047-a India in ram hmasawn leh ropui 'Vikshit Bharat' a siam a nih theih nan Village Council chu hmanraw tangkai tak an nih mek thu a sawi a ni.



EF&CC MINISTER

EF&CC Minister Pu Lalthansanga'n thalaite chu mi hlawhtlingte hlawhtlin chhan zirchiang a, an hlawhtlinna phena an thawhrimna hmuh thiam a tul thu a sawi.

Nizana Rev. H. Chinzapaua Memorial Inter Village Football Tournament kharna hun a hmanpui na ah he thu hi sawiin Khuallian Pu Lalthansanga chuan Infiammite tana pawimawh ber chu mahni inthunun theihna a nih thu a sawi a, Infiammite chu rual u zawk ten an tawn hriat tawh atanga thu tha an sawi leh an hrih thin te chu zawm tum zel a that thu a sawi a, mi hlawhtlingte hlawhtlin chhan zirchiang a, an hlawhtlinna phena an thawhrimna hmuh thiam a tul thu leh chu thawhrimna chuan vanneihna a ken tel thin thu a sawi a, infiammite chu mi hlawhtling tia sawi an nih ve ngei theihna tura thawhrimna kalsan ngai lo turin a fuih bawk.



MISS MIZORAM

Zonet TV Pvt. Ltd. buatsaih, WCD Miss Mizoram thlanna chu nizan khan zawh fel a ni a, WCD Miss Mizoram 2026 atan, C. Lalthlamuanpuii, Bawngkawn South thlan a ni.

SFX of Miss Mizoram

Miss Mizoram ah hian 1st Runner up-ah Saitluangpuii Sailo, Pachhunga University College thlan a ni a, 2nd Runner up-ah Vanlaltanpuii, Serchhip te thlan an ni bawk.



HEALTH MINISTER

Health Minister Pi Lalrinpuii'n nimin khan Post Graduate Institute of Medical Education and Research (PGIMER), Chandigarh tlawhin ZMCH nen thawdun dan tur a sawipui.

Health Minister hian ZMCH nen Teachers Students Exchange Programme neih theih dan tur a sawipui a, ZMCH-a Lung lam zaina, Cardio Thorasic hawn thar turah thawktuten practical training an neih chhoh zel dan tur a sawipui a ni.

Health Minister hi PGIMER Director, Dr. Vivek Lal-an a lo dawngsawng a, ZMCH nen thawh ho theih dan kawng awm thei ngei se a duh thu a lo hrih a. A rang thei ang bera thawh ho-na a awm theih nan MoU pawh ziah ran a duh thu a sawi a. Hetihual hian MD Course-ah Sponsored seat an neih loh avangin Mizoram Doctor zingah Entrance exam paltlang tam zawk awm tura tanlak ni se tha a tih thu a hrih a ni.



KVK THINGDAWL

Kolasib Deputy Commissioner Pu H. Dolianbuaia chuan Thingdawl-a sawrkar hmun pawimawh hrang hrang a tlawh kualin thawktute nen hmasawna tur hrang hrang an sawiho.

Kolasib DC chuan tualchhung mite hnena JNV pawimawhna thehdarh a tul thu a tarlang a. Zirlaite Hindi tawng thiam kawngah leh zirna bakah thiam thil dangah te hma an sawn chu lawmawm a tih thu sawiin, sikul tha taka enkawltu Principal Pu Hari Om Shukla chungah lawmthu a sawi bawk.

Hemi hnu hian DC chuan Thingdawla Veterinary Farm leh District Agriculture Centre bakah Horticulture Centre of Excellence, Thingdawl ami chu tlawhin thawktute nen hmasawna tur hrang hrang an sawiho a ni.



Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



DISABILITY CERTIFICATE

Social Welfare, Women & Child Development Department leh Health & Family Welfare Department tang kawp hma laknain vohbikte tan Disability Certificate/UDID Assessment & Certification Camp chu April ni 22–24 chhung khan Lunglei District chhunga Thenhlum, Lungsen–II leh Tlabungah te buatsaih a ni.

He Assessment & Certification Camp-ah hian Bughmun, Lungsen leh Tlabung RD Block chhunga khaw 39 atangin vohbik mi 303 te chu Disability Certificate/UDID pe chhuak tura endik an ni a. Vohbikte zinga Aadhaar siam that ngaite chu siam thatsak nghal an ni bawk.



BJP

Bharatiya Janata Party (BJP) National Spokesperson Pi Shazia Ilmi chuan kar kaltaa Parliament-ah Congress, Samajwadi Party, TMC leh DMK-in Lok Sabha-ah hmeichhe quota zaa 33 hauhsakna, Women's Reservation Bill an dodal chuan ram mipui zatve vel an phatsan a, hmeichhiate chawisan an duh loh zia a lantir a ti.

Nimin khan BJP Mizoram buatsaihin Aizawl Press Club-ah BJP National Spokesperson Pi Shazia Ilmi leh Pu Devesh Kumar, Bihar MLC, BJP Mizoram Prabhari ni bawk chuan thuthar thehdarhtute kawmin, BJP National Spokesperson chuan Prime Minister Narendra Modi chuan ram rorelnaa hmeichhiate hmun pek ve chu induhsakna thil ni lovin thil nih dan tur a ni tih chiang takin a lo sawi tawh a ti a. BJP chuan hmeichhe chawisan leh mipui rorelna tihchak kawngah a inpumpek a, hmeichhiaten an dikna chanvo an dawn ve theihna tur dodal tute chu an dolet zel dawn tih a sawi.



LPG

Sawrkar laipui chuan ramchhungah LPG supply tluang taka a kal thu leh distributor ten LPG an nghei loh thu a sawi. Union Ministry of Petroleum and Natural Gas Secretary Sujata Sharma-i sawidanin West Asia buaina karah LPG supply hi khaihlak awm miahloin tluang taka kalpui a ni a. Home Delivery chu uar zawka kalpui anih thu sawiin mipuite pawh online booking hmang uar tura chah an nih thu a sawi a. Distributor-te a hmuna va pan tam lo tura ngen an ni a ti. Pi Sharma-i chuan Commercial LPG pawh zaa 70 thleng khawl a nih tawh thu a sawi a. Hei bakah hian petrol leh diesel ah pawh harsatna a thleng lo niin a sawi a ni.



ELECTION

West Bengal Assembly inthlan thawhnhnihna atana campaign chuan a vanglai a thleng chho mek a. Tun thla ni 29 ah vote thlak tur niin Assembly seat 142 ah inthlan a ni dawn a. Nimin khan Prime Minister leh BJP senior leader Narendra Modia chuan South 24 Parganas district-a Baruipur ah thu sawiin TMC sawrkar ah eirukna, hna vang leh dankalha pemluh a hluar hle a ti a. Hetihlai hian Tirnamool Congress hruaitu leh West Bengal Chief Minister Mamata Banerjee chuan Howrah ah thu sawiin a kauhhraina hnuaiyah an state chu a him a ti.

West Bengal Assembly inthlan vote tla te hi thlaleh ni 4 ah chhiar a ni ang.



SC

Sawrkar laipui chuan kum 2025-26 chhungin Schedule Caste zirlai nuai 75 chuangte hnenah an zirna puitu atan cheng vaibelchhe 7981 a sem. Union Minister for Social Justice and Empowerment Dr.Virendra Kumar chaun sawrkarin mitin huapzo hmasawna pe turin theihtawp a chhuah thu leh tupawhin an chanvo diktak an chan theih nan hma alak thu a sawi a ni.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 133-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

